

COLLEZIONE

DELLE MIGLIORI OPERE SCRITTE

IN DIALETTO VENEZIANO

Bartolommeo, Gamba

VOLUME I.

*Edizione protetta dalle Leggi vigenti, aven-
dosi adempito a quanto in esse viene
prescritto.*

POESIE

DI

ANTONIO LAMBERTI

VOLUME PRIMO

V E N E Z I A

AL NEGOZIO DI LIBRI ALL'APOLLO

M. DCCC. XVII.

Dalla Tipografia di Alvisopoli

1-3

15-9943

854.7W

G 142

v. 1-3

A CHI LEGGE

Ora per la prima volta si presentano al pubblico insieme raccolte queste Poesie, che senza far onta alla verità possiamo asserire di avere quasi strappate dalle mani del loro chiarissimo Autore. Chiunque ama le amene fantasie di Anacreonte, i vivi sali di Esopo, le tenere pitture di Mosco e di Teocrito; e chiunque ha vaghezza di vedere al vivo dipinti e costumi e passioni e caratteri e la più amabile giovialità avrà di che soddisfarsi colla lettura delle inimitabili *Canzonette* che si troveranno raccolte in questo primo volume; degli *Apologhi*, e

degli *Idillj* che formeranno il secondo volume, e delle *Stagioni Cittadinesche e Campestri* che daranno materia al terzo ed ultimo volume. Il peregrino ingegno dell' Autore sta ora occupandosi in opere di maggior polso, le quali arricchiranno di sempre nuovi e preziosi tesori il veneziano dialetto, così nato fatto per l'armonia da meritarsi il sorriso più puro delle Grazie sotto il cielo italiano.

CANZONETTE

IL LAMENTO

No, no xe vero, Filide;
Che per cambiar teren
Se cambi el mal in ben,
L'afano in gusto:
Co xe amalada l'anema
Per tuto podè andar,
Ma per tuto portar
Con vu la piaga.
Se fusse mai possibile
Menar un condanà
Ne la preson sarà
Da un polo a l'altro;
El ciel ridente o torbido
Nol cambierà de ton;
Per lu sarà preson
Parchi e zardini.
Tal so' anca mi; d'un atomo
Con tuto el mio variar,

No m'ò sentio à scemar
Nel cuor l'afano.
La tropo cara imagine
Sempre xe viva in mi;
No vedo altro che ti,
Ti sola sento.
Ma, cara, oh Dio! do' fulmini
Quei bei occhi me par,
E i vedo a condanar
La mia fredezza.
E pur no son colpevole:
Se ti m'è leto el cuor,
Ti averà del dolor
Visto le marche.
Perchè quel zorno oribile
Che t'ò cussì lassà,
No elo stà scancelà
Dai dì de l'ano?
Perchè un destin teribile,
Perchè un dover tiran
M'ha da tegnir lontan
Da chi è 'l mio tuto?
Za le infernali furie
Strazza ogni dì sto sen,
Sento tuto el velen
Dei so' serpenti.
El sono (che dei miseri
Sempre l'è bu pietà)

Da dopo che son qua
Mai no l'ò visto ;
Nè ò visto che le tenebre,
El silenzio, el dolor
A ste noti d' oror
Formar cortegio .
Jer sera un leto morbido
Non ò possù sofrir,
Che m' à parso dormir
S' un leto d' aghi.
Son sbalzà su da rabia,
Al ciel seren so' andà,
Ch' el gera illuminà
De stele ancora .
Oh! come ò visto placida
Natura a repossar !
Oh! quanto a tormentar
M' à bu l' invidia !
Za scomenzava a perderse
Ee stele; e 'l di vicin
El cantor matutin
Za salutava .
E solo l' alma Venere
S' aveva in ciel fermà
Per compassion, chi 'l sà?
De un qualche amante .
Za andava sbianchizandose
Verso l' oriente el ciel,

E i zefiri de' miel
 Spruzzava i fiori;
 La bionda Aurora, alzandose,
 Facea col so splendor
 Cambiar in t' un rossor
 Quela biancura;
 E da quel lume vivido
 Le montagne a indorar;
 E dopo a rossizar
 Vedeva i coli:
 E 'l ragio vivacissimo
 Del Sol, che avea spontà;
 Rifletteva qua e là
 Sui prai, sui campi;
 E sora l' erbe morbide
 Che l' andava a ferir,
 Vedevi a comparir
 Perle e diamanti.
 Chi mai con sto spettacolo;
 Quando nol gera un mi,
 Benedio quel bel di
 Non averave?
 E pur l' oror, le tenebre
 Ò bu a desiderar
 Per poder pascolar
 La mia tristezza;
 Che za no pol un'anema;
 Ch' à perso el caro ben,

Goder più pase in sen;
Sentir più gusti.

Più gnente no la stuzzega,
Gnente piacer ghe dà,
Co quel ben no la gà
Che la riempiva.

Ben i se acorze, Filide,
De la mia situazion,
E som la derision
Dei mii nemici;

Ma deridème, stolidi,
De mi ludibrio fè,
Gussì, no meritè
D' esser afiti;

Che st' afizion, ste lagreme,
Che me vedè a sgorgar,
Queste me fa stimar,
Non avilirme.

El mio no xe incantesimo;
El vero ama sto cuor;
Qua no à bisogno Amor
De far el mago.

Co 'l voglia d' una Filide
Qualche cuor impiagar,
Nol la ga che a mostrar;
Xe tropo ancora.

Cussi volesse el barbaro
Mostrarme el caro ben

Col bel ochio seren,
 Col bel sorriso ;
 Cussi, in quel dì terribile
 Ch' ò da vegnirte a dir:
O perdona , o morir
Vedime , cara :

Quela man adorabile
 Me avesse a sollevar;
 Sentisse a pronunziar:
Sì , te perdono.

Tuti i momenti numero
 Ch' à da portar quel dì ,
 Ma tremo in fra de mi
 'Per quel momento.

Sarastu quela Filide,
 Che con tanta pietà
 M' aveva perdonà
 L' ardir de amarte?

O un altra? Ah no, comovite,
 Pensa in che stato son,
 No zontar affizion
 A chi xe affito .

Nol crederla provandolo:
 Ti sa' coss' è dolor?
 Mi l'è visto quel cuor,
 So quanto el sente.

Sì, el mio lamento, Filide,
 Comoverà quel sen ,

E se cambierà in ben
Tutto l'afano ;
Terminerà le lagreme ,
Le pene cesserà ;
Quel che no finirà ,
Sarà, l'amarte.

LA RIFLESSIONE

Chi se ajuta a minchionarse
El piacer lo gusta più:
L'artifizio de inganarse
Xe a le volte una virtù.
Mai vedè sortir l'Aurora
Come in versi la lezè;
Mai cussi no la vien fora;
L'è un ingano, ma godè.
Se quel baso a Nina bela
No avè dà proprio col cuor;
No xe arzentò de copela
Le carezze del so amor.
La se ingana, e pur la gode;
Vu godè, ve minchionè;
Monea falsa paga e scode
L'uno e l'altro; ma godè;
Credè quela un' Eloisa, .
Deventè sentimentàl;

No se' tali po' in camisa ;
Ve inganè, ma no stè mal :
Co gh' è un giozzo de riflesso ;
Schiao patroni sior piacer ;
Trovè el vero tropo spesso
Che no è molto lusinghier .
Minchionarse , minchionarse ;
Cari amici, se se pol ;
Za se ariva a sminchionarse ;
E xe alora che ne dol .

LA NECESSITÀ

No xe l'età freschissima ,
No xe contento el cuor ,
So che l'Amor xe un perfido ;
Nè so scampar da Amor .
So che un' amante fervida
Spesso la dona xe ;
Co no l' amè sul serio ,
O pur se no l' amè ;
Ma so che la xe insipida
Senza impizzarse el cuor ;
E benchè Amor sia un perfido
No so scampar da Amor .
So che a so' mare Venere ,
Sporzendoghe la man ,
Sparagno afani e spasemi ;
Scampo dal dio tiran ;
Ma che le so' delizie
Sazia, nè ariva al cuor ;

E benchè Amor sia un perfido
No so scampar da Amor.
So che la benda magica ,
La benda d' ilusion ,
Strazza dai ochi ai omeni
Filosofia e razon ;
Ma so , che senza iluderse
La vita xe languor ;
E benchè Amor sia un perfido
No so scampar da Amor .
So.... ma el saver no medica
Chi è nato per sentir ;
E so , che no scampan dote
Tropo averò a sofrir ;
So che in quei ochi, o Filide ;
Xe sconto el traditor ;
Nè so scampar da Filide ;
Nè so scampar da Amor .

LA GONDOLETTA

La Biondina in gondoleta
L'altra sera gò menà;
Dal piacer la povereta
La s' à in bota indormenzà,
La dormiva su sto braccio,
Mi ogni tanto la svegiava;
Ma la barca che ninava
La tornava a indormenzar.
Fra le nuvole la luna
Gera in cielo meza sconta,
Gera in calma la laguna,
Gera el vento bonazzà.
Una sola bavesèla
Sventolava i so caveli,
E faceva che dai veli
Sconto el sen no fusse più.
Contemplando fisso fisso
Le fatezze del mio ben;

Quel viseto cüssi slisso ;
 Quela boca e quel bel sen ;
Me sentiva drento al peto
 Una smanìa, un missiamento ;
 Una spezie de contento
 Che no so come spiegar .
So' stà un pezzo rispetando
 Quel bel sono, e ò soportà ;
 Benche Amor de quando in quando
 El m'avesse assae tètà ;
E ò provà a butarme zozo
 Là con ela a pian pianin ;
 Ma col foga da vicin
 Chi averia da ripossar ?
M' ò stufà po' finalmente
 De sto tanto so dormir ;
 E gh' ò fato da insolente,
 Nè m' ò avudo da pentir ;
Perchè, oh Dio, che bele cosse
 Che gh' ò dito, e che gh' ò fato !
 No, mai più tanto beato
 Ai me' zorni no son stà .

IL TU, E IL VOI

Nina, dov' è quei tempi
Che in barca da traghetto;
Su l'ora del frescheto
Se andava a scorsizar?
Che sol de le to' grazie,
Del to bon far vestia;
Ti davi zelozia
A qualche Dea del mar?
Dov' è quei di beati
Che un marendin bastava,
Che ambrosia el diventava
Solo da ti tocà?
Che in mezo al to matezzo
Donandote a l'amante,
Ti 'l favi in un istante
Felice ed inganà?
No ranghi, no tesori
Te dava allora el cielo,

Ma el fresco, el bòn, el belo;
 E un cuor inzucherà;
 Anima morbinosa,
 Ochieto biseghin;
 Sen d'alabastro fin
 Sul torno lavorà.
 Con tante grazie adosso;
 Fresca, matona e bela
 Chi, furba e baronzela
 No aveva a deventar?
 Ti 'l geri, o caro ogeto,
 E Amor, me lo perdona;
 Furba cussì e barona
 Più te saveva amar.
 Quanto è diversa, oh Dio!
 Degnissima signora,
 Sta vita che ve onora
 Da quei beati dè!
 Quel omo grandò e grosso
 Che fè a la porta star,
 L'immagine el me par
 Giusto del tempo a mi;
 Par che da vu el descazzi
 Co quel so brutto viso
 Piaceri, amori e riso,
 Che nol li voglia più.
 In fati, quei puteli
 Mati, insolenti e schieti,

Sui ricchi vostri leti
 Trema de montar su:
 Oh Dio! me li ricordo
 Vegnui per el balcon;
 Sentarse in cufolon
 Su quel to letesin;
 E far mile matezzi,
 E ti scherzar con lori;
 Riso, piaceri, amori,
 Pianzè 'l vostro destin:
 No, quei tapèi, signora,
 Tessui per man d' Arane,
 Nè quei che le Persiane
 À ordio co le so man;
 Nè quella vostra tanto
 Superba arzeria;
 I piati con maestria
 Incisi da German (1);
 Quei vostri Gabeti
 Fati a vernise fina,
 Che l' arte de la China
 Ariva a superar;
 I vasi Giaponesi,
 Le chichere del Vezzi (2),

(1) *Valente incisore in argento.*

(2) *L' ab. Vezzi fabbricatore di superbe porcellan
 in Venezia.*

E quei tanti altri pezzi
Che usè de doperar ;
Quel padiglion magnifico
Che alzè co' se' in campagna,
Dove no sol se magna
Al fresco i dì d' istà,
Ma che s' impianta spesso
Soni, festini e canti,
E tuto quel che incanti
Dal mondo vien chiamà ;
Le zoje che avè al colo,
Le bucole, i rechini,
E le perle e i rubini
Che ai brazzi vu porte ;
Le franze, i fiochi, i merli,
E tanti bei recami,
Le stofe ed i pelami
Che a casse conservè ;
In soma tuta quela
Pompa che Dea ve rende
Ai ochi che no intende
La vera volutà :
Perdona, cara Nina,
No condanarme e tasi :
No val un per de basi
De la to prima età.

LA MARINA

Za se abbozzava el zorno;
Le stele in ciel spariva,
L'aurora compariva
El mondo a ralegrar.
Un bel matin de zugno,
Che a Lio su la marina
Gera co la Biondina
El fresco a respirar,
Con un fioreto in testa
La gèra, e coi caveli
Che sparsi in biondi aneli
Ghe zogolava in sen;
No la gaveva busto,
Nè veli, nè cerchieto,
Ma solo un corsiereto
E un bianco bocassin.
Messa cussì, in quel' ora,
Puzada sul mio braccio;

Pensève che strapazzo ;
 La fava de sto cuor !
La se ne gera acorta
 Sta furba, sta strigheta,
 E a darme la stangheta
 La s' à volsù provar:
Varda quel Sol, la dise,
Co belo ch' el vien fora ;
E come che l' indora
L' acqua col so splendor !
Come ch' el venteselo
Va l' aria rinfrescando
Come se va ingrespando ;
Placidamente el mar !
Ma mi, che come brase
 Tuto de drento ardeva ;
 Pensève se gaveva
 Più voglia de vardar.
Ti, *ti xe el Sol*, rispondo,
Per mi, nè gh' è altri Soli ;
O che ti me consoli,
O vedime a morir.
Pietosa quei ochieti
 Verso de mi la move,
 E sento che me piove
 Mile dolcezze in sen.
La man ghe strenzo allora,
 La bela me risponde,

Le idee me se confonde;
Più no me trovo in mi.
De st' estasi beata
Chi poderia parlarve?
Coss' oggiio da contarve
Se in mi no gera più?
So che svegià m'ò visto
Sentà co la mia Bela;
E Amor sentà con ela;
Ma mezo indormenzà.

IL PENSIERE

Vado pensando, Nonola;
Quelo che Amor facesse
Quando ch' el te vedesse:
No xelo un bel pensier?
Mi ghe scometerave
Ch' el restaria incantà;
E che dopo el dirave:
Sta dona ghe xe qua?
Cussì el dirave, Nonola,
E po' dopo a bel belo
Quel mato de putelo
Te vegneria a basar
Prima la man, po' un braccio,
E po' el faria un sestin,
E po' dopo el furbazzo
A pian, a pian pianin
L' anderia rampegandose
Più in su, più in suso ancora

Disendo: *La inamora*
Custia l'istesso Amor.

E nol staria più quieto,
 Come i puteli fa,
 El chiapària un ochieto;
 La boca; e po' chi sà?

E ti po' disgustandote
 Ti lo manazzaressi:
Putelo, ti diressi,
Stà quieta, via sii bon.

E lu, come i puteli;
 Mezo mortificà,
 In quei to bei caveli
 Tuto quanto imbautà;

Parlandote, pianzendote,
 Tanti sesti el faria,
 Che alfin te sentiria
 Dirghe: *Vien qua, baron.*

Alora, con quel sesto
 Che pol aver colù,
 Svolando presto presto
 Ora zozo, ora su,

L' anderia cocolandote;
 E ti ti ridaressi,
 E ti diventaressi
 Più bela assae de lu.

Ma mi diventio mato?
 Amor t' à da vardar?

No elo lu che t' à fato?

Quèsto xe zavarar.

Ah sì son mato, Nonola,

E pur tropo lo vedo;

Figurite, che credo

Che ti me vogi ben.

E pur te pregaria,

Cara, benchè sia tal;

Lassarme in sta busia;

Za no la te fa mal.

IL DUBBIO

Mi, co' te vedo ; sento
Un certo no so che ,
E digo che nol sento ;
E digo che nol gh' è .

Mi, me se inchiava i denti
Quando te voi parlar ,
E digo, i xe acidenti ;
Digo che l' è 'l mio far

Me cocola una bela ,
E invece penso a ti ;
E digo che xe quella
Un' incostanza in mi :

No visitarte zuro ,
E so' ogni sera qua ;
E credo e son sicuro
Che l' uso m' à portà :

Voi disgustarte , e sento
Proprio che no son bon ;

Ma digo : no lo tento
 Perehè no go rason.
Me meto anca in borezzo ;
 E po' so' imusonà,
 Ma digo : l'è un matezzo ;
 Sempre cussi son sta.
Digo ste cosse , è vero ,
 E pur no stago ben ,
 E se ò da dir sincero
 Go de l'afano in sen :
Cossa che sia sto impianto
 Voria saver da ti ,
 Essendo che da tanto
 No son capace mi ;
Vorave po Eco el caso ...
 No posso andar più in là ,
 Tremo , barboto , taso ...
 Saravio inamora?

LA RIUNIONE

Silvia, la bionda Silvia
Che un tempo de sto cuor
Xe stada la delizia,
Che m' à imbriagà d' amor,
Lusendo in ciel chiarissima
La luna a meze istà
Sui fiori e l' erba tenera
S' avea con mi sentà.
Nè 'l tempo, nè altre Veneri;
Nè quel tremendo sì
Avea la bela imagine
Mai scancelada in mè.
Fissi un co l' altro, immobili,
Se stevimo a vardar;
El cuor sentiva a baterme,
Ma no podea parlar.
Alfin co un' ose languida,
Che ben facea capir

La situazion de l'anema,
 Cussì m'ò messo a dir:
Questa è quel' acqua limpida
Che semo andai ti e mi
A scaturar i gamberi;
 No è vero? e Silvia: — Sì. —
 — E là, da drio quei albeti
Che la se va a stagnar,
Xe dove che quel'anera
Ti m'à mandà a chiapar;
Che tropo cocolandola
Tanta gran rubia ò bu,
Che voleva maxxartela ...
Te recordistu più?
Che dopa benedivimo
Le colere d'amor;
Che in dò nu no sentivimo
Che un'anema, che un cuor?
I gran momenti, Silvia!
Ch' i n' abia più a tornar?
Ela un' ochiada tenera
Lassa su mi cascar.
 Allora strucolandoghe
 La man, digo: *Mio ben;*
Come in quei dì, assicurite;
Arde per ti sto sen;
Ma ti? Quele t'ò lagreme
Voriele forse dir,

*Che t' amor te rimprovera
Che ti torni a sentir?*

*Ah! pensa, ch'el primissimo
Son che ti gh'à zurà
In quei zorni beatissimi
Eterna fedeltà;*

*Che quel dover terribile
Che t' à sbregà da mi
Per quatr' ani continui
A intossegà i me' di;*

*Che da la mia memoria
Mai n' ò savù scazzar
Quele to tante grazie,
Quel soave parlar;*

*Mai quei cavei finissimi,
Quei laveri de miel,
Quel bel ochio ceruleo
Che me ricorda el ciel;*

*Pensa Ma interrompendome,
Senza però parlar,
Da quella man bianchissima
Me sento a slontanar.*

*Oh Dio!... mortificandome,
Dopo de aver slanzà
De le ochiae languidissime;
Che diseva, pietà,*

*Ai pie de la mia Silvia
Za gera per morir ...*

Amor un tal spetacolo
Non à possù sofrir.
Quela tremenda fiacola
L' à fato sbampolar ;
La luna in t'una nuvola
Se xe andata a serar.
Un fogo vivacissimo
S' avemo sentio al cuor ;
Son certo che se amevimo ;
Se nò, coss' è l'amor !
Come po' che se amessimo ;
Cossa de nu sia stà,
Mi no savaria dirvelo :
Domandèghe a quel pra.

LA CONSOLAZIONE

Me vede malinconico.
Catina l' altro dì
E la me dise: *Trotolo,*
Cossa mai gastu? E mi:
— *Sapi, che Lila ... — Lila?*
Ti ghe vol ben ancora?
Va via sastu in malora: —
— No lo sastu anca ti? —
— *Lo so, maledetissimo,*
Ma ti l' à da scordar;
O va a l' inferno, o l' unica
Son che ti à da amar. —
— *Sì, te amerò ti sola. —*
— Mostro, te mazzaria,
Sì, za l' è butà via,
Sì, l' è negà sto cuor;
Ma, curte, sta to cocola
La t' à savù impiantar. —

- *Cossa? — Via presto, dimelo,
Che ti possi crepar: —*
- *L' à dito ... — Fa 'l smorfioso ...
Cossa? — Che la voria
Se no fusse omo ... Via —
— La me vorave amar: —*
- *Marfisa gentilissima!
Che anema che la ga!
Oh povero el mio Trotolo
Ti fa giusto pecà!*
- Donca cussì i me toca?
Va là che ti è un gran tomo;
Te desfarò de omo
Cussì la te amerà.*

L' A P E

TRADUZIONE DAL SICILIANO

Dime, Avéta bonoriva,
Perchè avanzistu l'Aurora?
No gh'è ancora anema viva,
No rossiza i monti ancora;
Trema e luse in ogni parte
Su l'erbete ancora intate
La rosada; ah! no bagnarte
L'ale d'oro delicate.
Nei so' verdi bocoleti,
Streti suso e fati in massa;
Sonachiosi xe i fioreti
Co la testa ancora bassa.
Mo via fermite cativa,
No stracar le alete ancora;
Dime', Avéta bonoriva,
Perchè avanzistu l'Aurora?
Vustu miel? cercistu questo?
Sera l'ale e no stracarte;

44
Mi te insegno un logo presto
Da suzzarlo e sbabazzarte.
La mia Nina a l' ochio belo
Ti comossi, e a le fatezze;
Svola al lavro; aponto in quello
No ga fin gusti e dolcezze:
Si, in quel lavro che un soriso,
Un soriso adesso infiora,
Ghe xe un miel de paradiso....
No ti suzzi, Avéta, ancora?

IL FIATO

TRADUZIONE DAL SICILIANO

Delizioso profumeto
Del qual st' aria xe vestia ,
Chi te manda? e da che via?
Che indovino ghe scometo :
Diria qualche testa sbusa ,
Che ti è fio dei più bei fiori ;
Che i so' balsami , i so' odori
Xe in ti uniti a la refusa :
Mi nol nego , la fragranza
Che dà ai fiori la Natura
Più balsamica , più pura
Ghe xe in ti , ma ghe ne avanza :
Diria un altro : un zefireto
Da l' Arabia fortunada
Quel' essenza prelibada
Suna suso' , e vien qua dreto :
Oh! se i boschì dei Sahei ,
Se d' Arabia l' erbe e i fiori

I gavesse de sti odori
Ghe starave drento i Dei!
Ti, ti ridi, che i se ingana:
Ah, baron de profumeto,
Che indovino ghe scometo?
Ti xe el fià de la mia Nana.

IL GELSOMINO

TRADUZIONE DAL SICILIANO

Zensamin, de far bravate
No so vederghè el perchè ;
Star in mezo a un sen de late ;
Mi nol nego, l'è un gran che ;
Ma le rose e i amaranti
Xe stai là, li ò visti mi ;
E un onor concesso a tanti
Xelo onor ? dimelo ti ?
Zensamin, te vedo a ciera ;
Un sovràn ti è diventà ;
Varda ben che avanti sera
Sto sovràn no sia fischia.
Farse gloria al dì d' ancuò
Che una dona v'ama ! oibò ;
Caro ti, l'è amor a fruo,
E ancuò l'ama, e doman no ;
Fuignà, vedistu, in tera
Quel garofolo ch' è là ?

43

Quel garofolo jer sera
Come un dio gera adorà;
Nè invocar Flora e Priapo
No ghe val; nè dire: *oimè*;
Lila mia, per ti son fiapo,
Che pietà per lu no gh'è.
Benchè ancuo ti sij l'eleto,
Ti averà per sucessor,
Chi lo sa, zensamineto?
Forse ancuò de zuca un fior:
Che nel regno d'incostanza
Gh'è cucagna, credi a mi:
Tuti ga la so speranza,
Se no un zorno, un altro di.

I L S O F A

Vicin a Nina
Xe tuto incanto,
E par che l'arte
Sia nata là;
Ma quel che bisega
Che m' urta tanto,
Xe el so tempieto,
Xe el so sofà.

Se la vedessi!
L' è un paradiso,
Bisogna amarla
Da desperà;
Gran bele cosse
Che fa quel viso
In quel tempieto,
Su quel sofà!

Se del mistero
Fra l' ombre care
L' Amor da rente
Se gh' à sentà,
Sempre gh' à parso
Star co so mare
In quel tempieto,
Su quel sofà.

In sin che vivo
Mi vogio amarla,
E mi felice
Se me vien dà
De dir sta cossa,
De replicarla
In quel tempieto,
Su quel sofà.

Vu che voressi
Sbregarme via,
Voria mo' veder
Che forza ga
La vostra tanta
Filosofia
In quel tempieto,
Su quel sofà.

Mi za nol nego
Che sta barona
Gabia un matezzo
Che va al de là ;

Ma oh Dio! chi è savia?
Disè, che dóna?
In un tempieto,
Sora un sofà?

IL CONSIGLIO

Se Amor mai da vu se vede,
Cari puti, a zogolar,
Per pietà no ghe dè fede,
No lo stessi a carezzar.
Su la boca el mostra el riso,
La dolcezza sul so viso,
Ma col rider su la boca
Pizzegoni e slepe fioca;
E fra mezo a le carezze
Mile stili, mile frezze
Quel furbazzo sa missiar:
Se savessi che zoghetto
Che m' à fato un di costù!
Dopo averme chiapà stretto
Da no moverme mai più,
Con un ago damaschin
Su la pele a pian pianin
Tuto quanto el me ponzeva;

Mi pianzeva; e lu rideva;
 E 'l diseva: *ti xe bravo,*
Ma, birbon, t'ho fato schiavo.
 La gran rabia che go bu!
 Saveu come che l'à fato
 A chiaparme sto bricon?
 El s' à messo come un gato
 Quachio quachio in cufolon.
 L' à spetà che un di Nineta
 Me contasse una fiabeta;
 Mi, credendo esser in porto,
 De colù no m' avea acorto;
 E lù, vien per da drio via,
 Chiapa, strenzi, e mena via,
 Nè val pianti, nè rason.
 A scrivazzi de sta sorte
 Sto baron ghe ne sa far;
 Come un bogia el dà la morte,
 Quanto un bogia el sa strozzar;
 Lu ga lazzi, el ga manèr,
 El ga forni, el ga caldiere,
 El ga corde e manganelli,
 El ga chiodi, el ga marteli,
 E lanzete e gamaùti
 Ah! scampèghe, cari puti;
 No se vince che a scampar.

LA LONTANANZA

Come el vilan l'istà,
Ch'el calor gh'è arsirà
L'erba e le biave,
Brama l'acqua dal cièl,
Che più dolce del miel
Per lu sarave;

Come che un pelegrin
Brama vederse alfin
D'un longo viazo;

E che un interessà
El tesoro trovà
Lo brama al sazo;

E come chi xe in mar,
Dopo un gran navegar
Sospira el porto;

E come brama san
La mare el fio lontan,
Solo conforto:

Come el Sol el Lapon,
 La libertà el preson;
 L'orbo la luse;
 Con un istesso ardor
 A bramar quel to cuor.
 Amor m' induse.
 Con un istesso? nò;
 De più bramar lo sò,
 Più lo sospiro.
 Quei altri, a delirar
 Noi vedo e angonizar
 Senza respiro;
 Mi sì, che sento in sen
 E le fiame e 'l velen,
 Nè go un conforto.
 Quel che zavarìa in mar
 No vorave trovar
 La morte in porto;
 Nè 'l pelegrin vorà,
 Dopo aver ben strussia,
 Patria e caena;
 Nè veder l'orbo el ciel
 Per no beber che fiel
 Disnar e cena.
 Mi, del to cuor paren;
 Aceto la preson,
 Morte disprezzo.
 Credilo, cara, sì,

Ogni ben l'è per mi,
Ben senza prezzo.
Ma come che l' amar
Ne fa spesso cascar
In tel delirio !
Sospiro per amor,
Desidero el to cuor:
Perche sospirio?
No me l'astu donà,
E no m'astu zura'
Mai torlo in drio?
E vero, sì, mio ben,
Ma ti è lontana, e in sen
Ti 'l ga col mie:

IL TROPPO E IL TROPPO POCO

TRATTA DAL FRANCESE

Ne la stagion dei boccolì,
 Sul tramontar del dì,
 Sentai soto una pergola
 Gerimo Nina, e mi;
 Mai più l'aveva vista
 Quanto in quel zorno bela;
 Fissà me gera in ela
 Disendoghe cussi:
 Quel che ti fa, mia cocola,
Xe tropo per scherzar,
Ma tropo poco, nonola,
Quando-ti vogi amar.
 Quele ochiadine tenere
Che co le mie se vien,
Fa che 'l mio cuor s'imagini
De bisegarte in sen,
 Ma de sto dolce ad onta
Parlar, che 'l cuor me toca

*Oh Dio! che la to boca
Co quèle no convien.
Quel che ec.*

*Se vo? scazzar de l'anema
Quel fogo che sofrir
M' à fato tanti spasemi,
Ti, ti mel sa proibir;
Ma se te digo, cara,
Sentistu in tel to peto
Per mi l'istesso efeto?
No ti me lo vol dir.
Quel che ec.*

*Su quele neve candide
Se sbrissa la mia man,
Neve che fa ardentissime
Un dio per mi tiran,
No trovo che se opona
La toa su quel momento,
Ma da là un poco sento
Cazzarmela loptan.
Quel che ec.*

*Qualche coral dai laveri,
E vero, t'ò robà,
E ti, compassionandome,
Robar ti l' à lassà;*

*Ma no ghe xe slà esempio
 Che da to posta mai
 Un de quei bei corai
 Ti m'aki regalà.
 Quel che ec.*

*Ah! Nina, se decidess
 No vol per mi el to cuor,
 Vien qua, piuttosto mazzime,
 Termina el mio dolor;
 Daghe sto premio, ingrata,
 A Noni che te adora,
 Fa che con elo mora
 El più costante amor.*

*Decidi, cara cocola,
 Se ti me vol burlar,
 O se xe vero, nonola,
 Che ti me vegi amar:*

*Pietoso el fio de Venere
 Allora s'è mostrà,
 E in t'una bela nuvola
 Insieme el n'è sarà.*

*No so se fusse al mondo,
 O pur da quel diviso,
 Ma so che un paradiso
 Gnente de piu no ga.*

*E ò dito: La mia cocola,
 Questo no xe scherzar,*

L'è far da seno, nonòla;

Questo xe vero amar. —

— Sì, co un soriso amabile

Ma insieme anca baron,

La dise, mi no dubito,

L'è amor, ti ga rason;

Ma el to vantar, perdona,

Fa che la to Nineta

Sul muso te ripeta

L'istessa to Canzon:

Quel che ti à fato, cocolo,

Xe tropo per scherzar,

Ma tropo poco, nonolo,

Quando ti vògi amar.

L'AMORE

De confessartelo,
Nineta, credime,
No go rossor,
Imperscrutabile
Ne l' uman genere
Trovo l' Amor.

Dise i Filosofi,
Che amor in genere
Xe l' Atrazion;
Che sta forza insita
Co la predomina
Forma le union.

Da la molecula
Indivisibile
Ch' esiste qua
A le rotabili
Masse de l' etere,
Tuto la ga.

Per questa rodola
Tanti Sateliti
Atorno al Sol,
Questa, semandose,
Questa, tolendose,
Tuto se tol.

Ela ve genera
L' acido, l' alcali;
L' etere, el sal;
La sa componerve
Bitumi, solfere,
Acqua, metal.

Le fibre organiche
Dei vegetabili
Che in tera gh' è,
Ela le assimila,
E fa che i germini
Come vedè.

Nè ghe xe un atomo
Che al mondo sta,
Che Amor no domini,
Che Amor non animi,
Che Amor no ga.

Ma descostandose
Dal mondo semplice
Sta relazion
Complicatissima,
E in ragion centupla,

60
Nasse l' union.
Perchè nei esseri,
Che una sensibile
Vita contien,
Tanto el s' imaschera
Che un vero Proteo
L' Amor divien.

Per questo, replico,
Nina adorabile;
Senza rossor,
Che indefinibile
Ne l' uman genere
Trovo l' Amor.

Perchè sto diavolo
Lo trovo un piavolo;
Lo trovo un cavolo;

Perchè l' è un bocolo,
Perchè l' è un brocolo;
Perchè l' è un mocolo;

Perchè l' è un' anima,
Perchè l' inanima,
Perchè el disanima.

Lu xe vivifero,
Lu xe pestifero;
Lu xe mortifero;

L' è zucherigero,
El xe saligero,
El xe acidigero;

El xe filantropo ,
 El xe misantropo ,
 El xe genantropo;
 El xe notambulo ,
 El xe sonambulo ,
 L'è tenebrambulo;
 L'è un bel putelo ,
 L'è un ladroncelo ,
 L'è un Machiavelo ;
 L'è un zogo ,
 L'è un logo ,
 L'è un fogo;
 L'è un covo ,
 L'è un vovo ,
 L'è un lovo ;
 L'è un globo ,
 L'è un gobo ,
 L'è un robo ;
 L'è un mato ,
 L'è un gato ,
 L'è un flato;
 L'è molo , l'è saldo ;
 L'è fredo , l'è caldo:
 L'è curto , l'è longo ,
 L'è un albero , un fongo ,
 L'è tondo , l'è acuto.
 Nineta , l'è tuto .

LETTERA A NINA

Adesso che la neve
Xe tuta desgiazada,
Chè pianze la to' pergola,
Che l'erba xe tornada,
Che sponta viole e bocoli;
Dime, dov'estu là? ...
Là, in quel bel pra, mia Nina,
Che i primi nostri amori
A visto in cuor a nasserne
Come che fa i so' fiori
Che sponta senza acorzerse?
Saressistu in quel pra?
Mo! ... là ò ridesto un tempo;
Là ò pianto; là le sere,
Nineta, te recordistu?
Mi consumava intiere
Fissandote, parlandote;
Come me ardeva el sen!

Co gera più fogosi,
 Più vivi i nostri afeti,
 El Sol pareva goderse,
 Cantava i pœletti,
 Andava via le nuvole,
 Tornava el ciel seren.
 Ti sarà là, mia cara',
 Ma mi no ghe son miga!
 Per ti se infiora i alberi,
 Nasse per mi l'ortiga,
 El ciel per mi xe torbido;
 Però ti più belo el Sol.
 Son qua, lontan, fra zente
 Che par 'na mascherada,
 Che come le formigole
 Va in riga per la strada;
 Che v'urta, che ve strucola;
 E spesso anca ve dol.
 Oh Dio! se ti vedessi
 A miera xe le case!
 Sastu che se pol perderse?
 Oh in soma, no me piase....
 E come mai pol piaserme
 Co Nina no xe qua?
 Lavoro come un storno,
 Sempre el Paron me cria;
 Fazzo el botiro a perderghe;
 E 'l vol mandarme via:

E mi, Nineta, credista
 Che me despiaserà?
 Qua mi no vedo Nina,
 Qua adesso è Primavera,
 Ma mi no posso acorzerme,
 Xe tuto zente, o piera;
 Qua no fiorisse un albero;
 Un fior no sa spontar.

Meza de sta gran zente
 Par sempre desperada;
 I pianze, i prega, i suplica,
 I dorme su la strada,
 E insin a mi limosina
 Me i vedo a domandar.

St' altra metà par rica,
 Vestii sempre da festa,
 I paga certe frotole
 Un occhio de la testa;
 L' oro, l' armento, credime,
 Par che ghe nassa in man:

I beve brodi negri,
 Acque che par lissiazzo,
 Sentadi in certe camere,
 E i magna in sin el-giazzo;
 In suma, certi tosseggi
 Da starghene lontan.

Quei loghi per sti siori
 Mi credo za che i sia;

Mentre i fa tanto strepito,
 Giusto la so Ostaria;
 E chi no ga da crederlo
 A tuto quel che i fa?
 Le done ride, chiacola,
 A tuti le fa ciera,
 Come le nostre femene
 El zorno de la Fiera,
 Ma assae più strambe, credime,
 Me par che le sia qua.
 Gh'è certe case grande (1)
 Che drento ga i balconi,
 E stanze che par scatole;
 Là, e sesti e canti e soni...
 Oh mi no so descriverte
 Le cosse che i sa far.
 Par de insognarse, Nina!
 M' à fato insin paura;
 Se vede monti, pascoli;
 Case, preson, verdura,
 Ma no ghe torno, accertite;
 Che là i ve pol strigar.
 De strigarie un gran numero
 Ghe n'è per ogni banda;
 O portà el late un venere
 In t'una casa granda,

(1) *Fuol indicare i Teatri.*

E un caso ... goi da dirtelo? ...

Sì, tuto t'è da dir.

Là vedo una Signora

Vestia da Dea del cielo;

La vien, la dise: *Picolo,*

Xestu quel pastorelo

Qua dal Pestrin de Bortolo?

Quel late voi sentir.

E dopo; *bravo neto*

Bon ti è anca ti pulito;

Ogni matina portalo

Qua, sastu, qua in sto sito:

Adio, biondoto: ascoltime

Fermite un poco qua.

Risponder no saveva,

Gera inzucà là in pie,

L' à scomenzà a discorerme,

A dirme, oh che busie!

Mi son scampà in t'un subito

E ò maledio quel dì.

La gera striga certo;

Ora l' avriva i ochi,

Ora la i fava picoli;

Mi, m' à tremà i zenochi,

Come chi vede el diavolo,

Ne son tornà mai più.

Nina, el Paron za impianto,

Torno da ti, careta,

Pascolerò le piegore;
Ma vederò Nineta,
Vederò l'erbe, i alberi;
E col mio ben sarò:

Sarò piu povereto,
No magnerò ogni zorno
Menestra, carne, intingolo;
Ma sarò manco storno;
La testa qua va in fregole,
E no se pol star ben.

Adio, Nineta bela,
Da qua do setimane
Sarò con ti; a revederse
Sul pra de le fontane.
Conservime sta Letera.
Scondila in mezo al sen:

L' EBREZZA

*T*olèghe carica
E cassa e talari
E campi e stabili
E casa e mobili
E la so cocola;
Cavèghe i abiti,
Fischè i so crediti,
Lassèghe i debiti,
Fe miserabile
Chi è sta invidiabile;
E po' doman
A quel medesimo
Metèghe in man
Un fiasco e un pofano
De vin teran,
Sie de luganega,
Quatro de pan;
Co no l'è astemio

*De l' adorabile
Oro potabile,
Lo vedarè
Tornar richissimo
Deventar re.*

*Questi xe i meriti
Che ga l' Autuno,
E contrastarmelo
No pol nissuno;
No el cielo placido,
No i zorni tepidi,
No i peri e i persegghi;
No i campi fertili,
No ste petegole
Che va a far tombole
Soto a le pergole,
Che va destruzerne
Senza costruto
L' ua venerabile,
Quel sacro fruto.
Salvo quel netare
Che dà l' Autuno,
Vita dei omeni,
Piacer d' ognuno,
Tuto xe frotolo
E romanzeti
De sti poeti,
Che fa sussuro*

*Co ste so favole,
Ma che dal muro
No cava un ragno;
In ton da catedra
Disea un bevagno;
E in sto dir col goto pien,
Co un bocal che va e che vien,
Con un resto de brisiola
De bon porco e primariola,
Del formagio e la noseta
L' à cantà sta Canzoneta: —
— In fra i Dei che da la favola
Vien ficai nel Panteon,
Baco solo se lo merita,
Che xe el vero, che xe 'l bon.
Per la fragia dei bevagni
La marmagia d' i immortali
I xe giusto tanti scagni,
Tante crepe de bocali
Da trar fora del balcon:
— Co l' Aurora el cielo ilumina,
E i prai torna a incolorir,
Caratèli e dote visito,
E ogni vin vògio sentir;
E a la bela Dea lusente,
Goto in man, mi ghe domando,
Astu visto là in Oriente
Un rubin più rosso e grundo*

Del mio naso a comparir?
 Se i me vien co fasso bachera
 Cento guere a dichiarar,
 De la tera el più gran despota
 No me degno de ascoltar.
 Gnente a tola me spaventa;
 E co bevo un vin picante,
 E che in ciel fulmini senta;
 Digo a Giove fulminante:
 El mio amor te fa tremar.
 Se mai morte la teribile
 Me farà chioco finir;
 De scamparghe no desidero
 E go gusto de morir.
 Anderò a la spiaggia averna
 A imbrigar Megera e Aleto;
 E voi verzer 'na taverna
 De Pluton nel gabineto;
 Ch' el me ga da benedir.
 Sto grazioso e caro netare
 I demoni vincerà,
 E i demoni e'l re dei diavoli
 Lodi a Baco canterà.
 Voi che Tantalo se goda;
 Che anca lu a la fin se sguazza;
 E a Ission su la so roda .
 Vogio darghene una tazza;
 Che un tantin lo quieterà:

*No de marmo, no de porfido
 Un sepolcro gaverò.
 Ma una bota, e fra la gripola
 El gran sono dormirò:
 Sia scolpio su la so base
 El mio goto, quel più grande,
 E sia scritto: Dorme in pase
 L'imbriagon piu venerando
 Ch'abia visto el Sol qua zo.
 Vegnerà, za no lo dubito,
 L'otavario a celebrar
 Più imbriaghi, strassinandose;
 Le mie cenere a onorar;
 E per far un'ecatomba
 Che a sto mondo me imortali,
 La mia bota, la mia tomba
 Con tresento e più bocali
 I me vegnerà a sguazzar.*

LUNA DI GIUGNO

Vu, che avè 'l cuor zentìr,
Vu, dolci amanti,
Vu, che ve amè costanti
Sin dal più verde April.
Za che se mostra in ciel
Sora d'ogni altra stela
Piena d' un dolce miel
Cintia la bela ;
Za che mai più cussi
Seren el viso ,
Nè grato xe stà 'l riso
Come che l'è in sti dì:
Vegni qua su sto pra
Da sti russei freschetti,
Da sti verdi boschetti
Intorno circondà;
Vegnìla a venerar ,
Vegni a sentìr in peto

Quel che la sa ispirar
 Divin afeto!
 Vardela su quel col;
 L'è arzentò puro:
 Za à da invidiarla el Sol,
 Mì son sicuro.
 E vardè là; vardè
 Fra quei lauri odorosi,
 Fra quei mirti amorosi
 Come a tratti la xe!
 Come vien a interzar
 L'ombra l'arzentò,
 Come la va a scherzar
 Fra i ramì drento.
 Oh d'ogni amante cuor
 Serenatrice;
 Oh ti consolatrice
 D'ogni amoroso ardor!
 Risplendi sempre in ciel,
 Mai no robarte,
 No portarghe sto fiel
 A chi sa amarte.

LUNA DI SETTEMBRE .

Proprio un azzal xe el cielo,
Un spechio el mar tranquilo,
L'aria no move un filo,
Xe moderà el calor.

La Luna, come brasa
Nata del mar là in fondo,
De secondo in secondo
Scolora el so rossor.

Eco, color de l'oro
La par in sto momento;
Eco, la par d'arzentò;
Ecola a dominar.

Scampa dal ciel confuse
Le più brillanti stele,
Che d'esser manco bele
Le stenta a tolerar.

Del mar la se fa spechio,
La fissa el viso belo ;

E 'l mar un altro cielo
 Se vede a comparir.
 Ste rive, ste vignete,
 E quanto se presenta,
 Tute le se inarzenta,
 Le gode al so aparir:
 La luse, che modesta
 La manda su l' ogeto,
 Fa che ne resti in peto
 Qualcosa da bramar:
 Crçarse in un tal stato
 Pol l'anima sicura;
 Piu bela la Natura
 La so' creatura amar.
 Radopia, o cara Eurila,
 Sto portentoso incanto,
 Toca quel' arpa, e al canto
 Unissila d'Amor;
 Cintia te lo domanda,
 Che benchè casta anch' ela,
 D' Amor la fama bela
 Un di à scaldà el so cuor!
 Varda! el so raggio adesso,
 Xe adesso sul to peto!
 Un amoroso efeto
 No te se svegia in sen?
 De mi no parlo, o cara,
 Che inutile xe ogn' arte,

77

Gnente no' so ispirarte....
E pur, mio caro ben,
Pur te amerò costante ...
Ma qual incanto novo?
In mi più no me trovo ... ,
Ti è un paradiso, sì
Co' apassionae ste voci!
Da che armonia interote!
Dopo una de ste note
Che se vergogni el dì.

**LE
QUATTRO
STAGIONI**

LA PRIMAVERA

Qualordes'anī,
Poco de più,
Do ochieti umani
Che varda in su,
Ma che ogni silaba
Li fa sbassar,
Un par de lavri
Da sbasuchiar.
Ghe vedè in viso
Vivo el color,
Ma un scherzo, un riso
Ve lo sa tor.
Xe i cavei l'ebano
Neto, lustrà;
Se la vol riderve
Le perla è là.
El colo è bianco;
Golmeto el sen,

Xe tondo el fianco ;
Xe 'l braccio pien .
Gamba sveltissima ,
Scarmo el penin ,
Le carne morbide ,
E tuto fin .
La Primavera ,
Za la vedè ,
E viva e vera
Sta puta xe ;
E la xe amabile ,
Gavè rason ,
Ma', assicurevelo ,
No è tuto bon .
L'è tropo acerba ,
Mi son sincer ,
E un fruto in erba
No dà piacer ;
Che se scampandone
La vol scherzar ,
Sempre no comoda
Quel so scampar .
La stà un momento ,
Mai co' se vol ,
E sempre a stento ,
Sempre ghe diol .
Se la ve cocola ,
La fa sentir

Un fredo, un grizzolo
Che fa dormir ;
Per un impianto
Ghe pianze el cor,
Ma tanto pianto
No ga savor.
Dolce è la colera ;
Se la ghe va ,
Ma dura el nuvolo
Più de l' Istà.
Xe belo tuto ,
E fresco e san ,
Ma acerbo è 'l fruto
Col tolè in man .

L' E S T A T E

Bei ochi, ma che fulmina
 Se mai la fe' alterar,
 Bei denti, ma che morsega -
 Se mai la fe' arabiar.
 Tempesta i slepi a refoli
 Da quele bele man,
 I afeti è capacissimi
 De farve in cavruman:
 La beca quanto un pulese,
 La ruza da moscon,
 La strepita, la pizzega;
 Ghe vien le convulsion.
 Se mi voggio depenzerve
 Quela che m' à strigà,
 Ste cosse descrivendove
 Digo la verità;
 E no gh' è al mondo un' anema
 Che no me diga a mi:

Perchè co sto arcidiavolo
 Vustu passar i dì?
 Se azonzo: l'occhio fulmina,
 Ma spesso el xe seren,
 E Amor svolazza e cocola
 L'occhio, el bel lavro, el sen;
 Rabiada la ve morsega,
 Ma in tuto el nostro amor
 No xe arivà sta diavola
 Che a morsegarme el cuor.
 Do slepi, a confessarvelo,
 Do slepi ò ricevù;
 Ma dolci afèti e lagreme
 Quanti no ghe n'ò bu?
 L'è viva, l'è ardentissima
 Co' Amor la fa impizzar,
 Ma mi sto ardor terribile
 Procuro de schivar.
 La beca, sì, la pizzega,
 Ma ve conforta un miel
 Che sin nel cuor s'insinua,
 Che drento no ga fiel.
 Spaventa quando s'agita
 Quel viso in convulsion,
 Ma gh'è i gran bei spettacoli
 In quella agitazione;
 Ghe xe dei zorni critici
 Ch'el belo pel rapir,

Ma da là un poco, un anzolo
 La torna a comparir.
 Negri i cavei finissimi,
 Azuro l' ochio e pien;
 Brazzo robusto e morbido
 Colmo e diviso el sen,
 Vivo e grosseto el laverò,
 Denti d' avorio, e fià
 Che senza droghe e aromati
 Xe sempre imbalsamà.
 La tinta vivacissima
 Ch' al brun tenta inclinar,
 Figura che una Palade
 Faria desmentegar:
 Se voi' cussì depenzerla;
 L' è ancora al natural;
 E tuto xe verissimo,
 L' è Nina tal e qual:
 E quei che desprezzandome
 Da mato m' à tratà
 Ariveria a invidiarne la:
 Letor, cussì è l' Istà.
 Toni, tempeste, fulmini;
 Un eccessivo ardor;
 Tavani, mosche, pulesi,
 E seco distrutor;
 Ma sempre el ton no strepita,
 De raro el va a ferir,

L'aria e l'ardor se mitiga,
 L'aguazzo sa vegnir;
 E s' arde, se destermína
 L'erbe e le biave el Sol,
 Natura xe in disordine,
 L'Istà gnente ghe pol:
 Ma i zorni serenissimi,
 El caldo temperà,
 L'ombre, i boscheti, i zefiri
 El ciel tuto stelà,
 Le piove che ressussita,
 Che xe a le piante un miel,
 Le aurore, i bei crepuscoli
 Che ve depenze el ciel,
 I fiori odoratissimi,
 I fruti, l'erbe, el fien,
 Le biave, i campi fertili
 Scorden tuto sto ben?
 No: se ghe xe dei radeghi,
 Se fiero xe l'Istà,
 El pol ben compensarveli
 Se tanti beni el ga.

L' AUTUNNO

Nè ragazza, nè vechiòta,
No grassona; ma grassota;
Morachiòta,
Furbachiòta,
Xe Toniòta.
La ga i ochi de carbon,
La ga tuto el resto bon;
La xe amiga, ma de cuor,
La se ride de l'amor:
Per servirve no la sua,
La ve tira zozo l'ua,
La ye porta là de tuto,
Pan', polenta, bon persuto,
E vin duro e marzemin,
E la svoda el Canevin:
La ga atorno dei puteli
Tuti grassi e tuti beli;
Co de l'ua la li contenta,

E co un tocò de polenta,
 E depenta
 Nel so viso è l'abondanza
 Senza amor, senza jatanza:
 La xe franca, la xe schieta,
 La ghe stà a la barzeleta,
 Dei bei prindesi la impronta:
 La xe cara co l'è ponta,
 La ve zonta
 Sempre el vin in tela tazza,
 E se sguazza,
 E cressendo l'alegria
 Tuti ponti se va via:
 Pur tuti i tempi,
 Pur tuti i dì
 Sta cara Tognola
 No xe cussi.
 La xe inzucada,
 La xe ingiazzada,
 La va pensando
 E sbadagiando
 Senza inacorzerse
 De sbadagiar;
 La voria pianzerse
 No la 'l vol far;
 Ma inacorzendose
 De sto difeto
 La core a scondersi,

O la vâ in leto,
 E da un di a l'altro
 No ghe xè altro,
 E la ve sfiamega
 Come fa el Sol;
 La torna Tognola
 Tuti la vol.
 Come xe Tognola;
 Cussi è l'Autuno,
 Che 'l corpo e l'anema
 Consola a ognuno.

No xe caldo, no xe fredo,
 Vedè tuto madurà,
 No se vive più sul credo,
 Se tripudia e se ghe n' à.

Chi va a la cazza,
 Chi va a folar,
 Chi 'l porco mazza,
 Chi va a balar,
 Chi co una cocola
 Fa le brazzae,
 Chi osèla al rocolo;
 Chi fa matae;
 Disnareti,
 Chiasseti,
 Spasseti,
 Prindeseti,
 Baseti,

Schërzeti

Col goto in man

De vin teran.

L' Amor se celebra;

Ma no el tiran.

Ma za de un velo

Se coverze tuto el cielo;

Fa frescoto,

E la piova è quà deboto;

Za le nuvole se sera,

E la piova casca in tera:

Vigne, colì, campi e prai,

No pol esser spassizai:

Seu per questo desperai?

Porco e fogheto

E un bon bichier;

Polenta e in leto

Co so mugier

Ve fa dolci anca sti zorni

Benche sie' stupidi e storni:

Ma la bora

Dal Nord vien fora;

Torna el Sol

Che fa belo el pian e 'l col,

E va via

Mal umor, malinconia,

Sin che ariva co l'Invernq

Neve e giazze sempiterno.

L' INVERNO

Gera d'Inverno, e gera in compagnia,
E xe sta messo in campo la question,
Se de l' Istà l' Inverno megio sia,
Lassando fora l' altre do Stagion;
Che la gran moda adesso xe i estremi,
E drio la moda se propone i temi.
E voltandose a mi: — Vu che avè fato
Piu volte le Stagion, me dise un tal,
Cossa ve par? l' Inverno ad ogni pato
Xe megio de l' Istà, l'è natural,
Ma no me fe parlar la fantasia,
Trovè fora rason e no poesia. —
— Mile grazie, ò risposto, ma no posso,
Che mi co la rason no me ne intrigo;
L'è tropo disgraziada, e ò visto in fosso
Per causa soa ai mii di più d'un amico,
E se la vol che diga, la permeta
Che diga el mio pensier, ma da poeta —

— Sì, sì, dise una dona, ~~pel~~ ga del sesto,
 E lasselo dir su quello ch' el crede. —
 — O mi, signora, me destrigo presto,
 Ma no pretendo che i me daga fede,
 E dirò, che l' Inverno è tal e qual
 Come una certa vecchia da Noal.

Longa, sutila e senza carne a torno,
 Con cento peli in testa tuti bianchi,
 Co una bochéa che la ve par un forno,
 E una brava sciatica in tei fianchi,
 Coi occhi del color che xe el persuto,
 E la tosse obligada in fefauto:

Se l'andava in carrozza, la diseva:

— Tornèmo in drio, ma par de sentir vento, —

Se qual cossa per casa la faceva:

— Sarè quella finestra e vigni drento. —

Co gera suto mai no la dormiva,

E col siroco no la digeriva.

Tuto quel che fa bela la Natura

E dà un' idea de vita e de creazion;

Gera per ela inutile fatura,

La stava quasi-sempre in t' un canton;

Quatordes' ore la passava in leto,

E l'altre a tola, o al zogo de picheto.

Pur la diseva: — *Co una ragazzota*

Sta mia tranquillità mi no barato;

I me dirà, che son una marmota

Perchè no ziro atorno come un' matq;

*Perchè passo i mii di fra quatro muri,
 E crio se no i me sera ben i scuri.
 Ma quel leto, quel sono e quel magnar,
 Quel bon goto de vin, quella pàrtia,
 I è gusti che de più no se pol dar,
 E tuto quanto el resto xe pazzia,
 E ordinarave mi, se comandassè,
 Che chi no fa sta vita i li impicasse —*

Chi *xe che de sta vechia no ridesse,
 E che no schiamazzasse a piena boca?
 E pur se un poco se ghe rifletesse
 L'Inverno a far sta vita za ne toca,
 E squasi tuti i gusti, a dirla schieta,
 Fenisse in pachio, leto, e camereta.*

Gh' *è qualche Inverno che se va stampando
 Per chi xe de l'Inverno protetori;
 Ma no l'è Inverno, e po' sto contrabando
 Ghe costa a la Natura dei suori;
 E come fa le done del bon ton,
 La vol refarse in st'altre tre Stagion.*

Se *xe un zorno seren, gh'è 'l giazzo in tera,
 E le gambe e la testa è a mal partio;
 A le vechie el borin ghe fa la guera,
 E ben che abiè el tabaro se' servio,
 Per tuti i busi el barbaro se fica,
 Ve brusa i ochi e 'l naso ve lambica.*

Se *xe siroco sguatarè de gusto,
 E quel'umidità ve ariva a l'osso:*

Nevega? Oh! allora sì, boca che vustu!
 Perché o s'ingiazzì o l'umido sia mosso
 Ve godè a spotachiar per el paese,
 E gavè un stilicidio per un mese.
 Senza fogo xe fredo, e'l fogo impizza
 E imiserisse, e val tre soldì un fasso;
 La stua ve inzuca, el caminar ve istizza,
 Co l'aria dei Cafè diventè un tasso;
 Se un teatro xe pien, l'aria xe un bagno,
 Se nol ga zente, ve impetri sul scagno.
 Dei reumi, de le ponte e de la tosse
 E de cento altri mali sfondradoni
 Mi no ve parlarò, che le xe cosse
 Che sta Stagion regala per bomboni.
 Curte, l'Inverno è morte, e stago saldo,
 Che no se trova un morto che sia caldo.

I N N O
ALLA
M O R T E

7

ALLA MORTE

Ti, Dea terribile,
Ti, dei mortali
Arbitra e despota
Senza rivali,
Ti, che ti domini
La tera e 'l mar;
Ti, che le porpore
E le corone,
Che al pien dei omeni
Tanto ghe impone,
Coi sachi e i zocoli
Ti sà missiar;
Ti, che l'imperio
De la fortuna,
Che me perseguita
Sin da la cuna,
Da formidabile
Ti sà domar;

**Ti, che quei stimoli
Discordi tanto ,
Che porta i omeni
De pianto in pianto ;
Che li fa martiri ,
Ti sa quietar;**

**E ti, che al misero
Senza conforto
Con man benefica
T'insegni el porto,
Ti , Dea teribile ,
Voi' celebrar .**

**Quanto xe stolidi
Chi destruttrice
Te chiama , o provida
Generatrice !
Quanto i xe deboli ,
Nel so pensar !**

**Dal di primissimo
Che sui mortali
E falce e fiacola
E l' arco e i strali
T' à dà 'l trifulmine
Per dominar ,**

**In tanti secoli
Ch' el mondo zira ,
L' imenso numero
De chi respira**

S'ha visto simile
 Sempre a restar:
 No ti è che pausa
 De la Natura;
 Se un omo termina,
 La spezie dura;
 E spezie e generi
 Ti fa tornar;

Che quel che regola
 Sto nostro mondo
 Quanti individui
 Vive qua in fondo,
 Come tanti atomi
 Sa contemplar.

E quella fiacola
 Che ne destruze;
 In miera d'esserī
 Spande la luze;
 E in miera d'esseri
 Ne fa cambiar (1).

Ma ne l' empireo,
 Ma ne l' inferno
 Nume più provido
 Nel so governo
 Chi sa trovarmelo;
 Chi 'l sa idear?

(1) L' autore contempla la disorganizzazione fisica
 del corpo animale.

Forse un Prometeo,
 Che vita e forma
 À dà a la polvere
 Che ne conforma,
 Che ragionevoli,
 N' à bu a crear?

Che a virtù languida
 L' à insieme unito
 Ogni delirio,
 Ogni prurito,
 Che l' imbramabile
 Ne fa bramar?

Ah! quanto infausto
 Sia stà ogni dono,
 Le tante supliche
 Che gh' è al to trono,
 Dea potentissima,
 Lo sa provar.

Sarè giustissimi
 Numi del Cielo,
 Ma impenetrabile
 Destendè un velo,
 E lassè un adito
 De mormorar.

Morte al contrario
 Senza misterò
 Dona benefica,
 Sempre sincero;

Sempre giustissimo
Xe el so operar.

Ela a la gloria
Salva i mortali;
Dal precipizio,
Dai più gran fali
La virtù debole
La sa salvar.

Vedo Virginia
Pretesa schiava;
Vedo el Decenviro
Che za trionfava
Su la so vitima
L'è per piombar;
L'è per destruzerghe
L'onor, la gloria;
Ma ti, la vergine
A la vitoria
Dal vituperio
Ti sa' portar.

Chi mai de un Dario;
Là in Arabela,
La funestissima
Iniqua stela
Che lo perseguita
Chi sa placar?
Forse quei providi
Celesti Numi,

Che tanti spatemì
 Che 'l pianto a fiumi
 Dei so' fioi miseri
 No sa tocar?

Dal stato oribile
 De schiava vita;
 Dal vituperio
 D' una sconfitta
 Ti sola, o provida,
 Ti 'l sa' sotrar.

E l' invincibile
 Che l' à desfato,
 Per tanti secoli
 Chi è sta che à fato
 Grande e magnanimo;
 Chi 'l fa onorar?

Ah! de la gloria
 Che lo iragiava
 El lume vivido
 Za za oscurava
 Vizio e tiranica
 Sè de regnar.

Se el nome celebre
 La fama spande;
 Se quel Macedone
 Se chiama el Grande;
 Solo el to fulmine
 Lo fa chiamar.

Quel pare misero

Fra quatro foli,
Che no g  un'anema
Che lo consoli;
Che le so lagreme
Xe el so disnar,

Che smunta e macera,

Su quatro strazzi
Vede puerpera
De tre regazzi
L'infelicissima
Che lo sa amar',

Che va slanzandoghe

In fra el sangioto
De le ochiae languide
Senz' altro moto,
Me par de vederlo
Morte a invocar,

Me par de vederte,

Morte pietosa,
Gnente teribile,
Gnente sdegnosa,
Quei miserabili
A consolar.

Me par de vederte.

Soto altro aspeto,
Sempre benefica,
Giusta in efeto,

La falce e 'l fulmine
Adoperar.

Vedo i Dionisi,
Vedo i Neroni,
Vedo i Caligola
Zozo dei troni
Per ti la polvere
A morsegar.

Chi dai pestiferi,
Chi ne purgava?
Forse el trifulmine
Che i consacrava,
E che intangibili
Ne i fa trovar?

Te onoro e venero,
Divin Petrarca,
E dolci lagreme
Spando su l' arca
Che le to ceneri
Sa conservar;

Ma, oh Dio! perdonime,
Perchè mai dirne:
Le piu bel' anime
La va a rapirne,
Le triste e perfide
La sa salvar?

Da la to Laura;
Ti l' à pur vista

Senza quel' orido
 Che la fa trista,
 Ti à sentio placida
 Morte a parlar:

*L'imparegiabile,
 La dona eleta,
 Prima che istabile
 Fortuna meta
 Nel miel l' assenzio,
 Vogio eternar.*

Oh! quante Laure
 Che da fortuna
 Sempre volubile
 Ne la laguna
 De tanti secoli,
 Ti à bu a sotrar!

L' ingiusto e 'l perfido
 Ti sola teme,
 E al miserabile
 Che oppresso zeme,
 Fa manco barbara
 Sorte provar.

E là ne l' Erebo,
 Là ne l' Eliso;
 Dove el reo crucia
 Da nu diviso,
 Dove se premia
 Reto operar,

Per ti ne l'Erebo
La colpa foca;
Beatitudine
Per ti ne toca,
E un novo secolo
Ne fa trovar.

Dea potentissima,
Solo conforto
De chi fra 'l turbine
Sospira el porto;
Benigna ascoltime,
No me sdegnar:

Sì, Dea terribile,
Sì, dei mortali
Arbitra e despota;
Tronca i mii mali;
Ti, che ti domini
La tera e 'l mar:

INDICE

CANZONETTE

<i>Il Lamento</i>	Pag. 9
<i>La Riflessione</i>	16
<i>La Necessità</i>	18
<i>La Gondolella</i>	20
<i>Il Tu e il Voi</i>	22
<i>La Marina</i>	26
<i>Il Pensiere</i>	29
<i>Il Dubbio</i>	32
<i>La Riunione</i>	34
<i>La Consolazione</i>	38
<i>L'Ape</i>	40
<i>Il Fiato</i>	42
<i>Il Gelsomino</i>	44
<i>Il Sofa</i>	46
<i>Il Consiglio</i>	49
<i>La Lontananza</i>	51
<i>Il Troppo e il Troppo poco</i>	54
<i>L'Amore</i>	58
<i>Lettera a Nina</i>	62
<i>L'Ebrezza</i>	68
<i>Luna di Giugno</i>	73
<i>Luna di Settembre</i>	75

LE QUATTRO STAGIONI

<i>La Primavera</i>	Pag. 81
<i>L' Estate</i>	85
<i>L' Autunno</i>	89
<i>L' Inverno</i>	93
INNO ALLA MORTE	99